

præsupponit minorem. Ea verò, per quæ res ab invicem distinguuntur, alia iisdem necessariò insunt, ut sine iis talis naturæ res esse nequeant; alia contingenter tantùm, sine quibus etiam talis naturæ res esse possunt. Ista essentialia, hæc accidentia vocantur. Accidentia igitur sunt, quæ rei essentiam peculiarem non dant, sed mutari in illâ possunt, ut tamen res quoad essentiam maneat id, quod erat. Essentia autem est id, per quod res aliqua præcise hoc & non aliud quiddam existit atque cognoscitur, & sine quo ad quæstionem: Quid sit? responderi non potest. Non ergo mutari essentia rei potest, ut nihilominus eadem maneat res. Unde regulæ sunt: Essentiæ rerum sunt æternæ; Essentiæ rerum sunt sicut numeri. Hæc essentia vel est in re singulari, quæ ideò vocatur *Individuum*. Vel multis individuis est communis, diciturque *Species*. Quod si individua communem essentiam habentia diversarum specierum sunt, ista communis essentia appellatur *Genus*, vel *Essentia generica*. Rursus, si res aliarum rerum respectu considerantur, quarum diversa est Essentia, unuscujusque Essentia dicitur *Differentia*, ac ea quidem vel *generica* est, vel *specifica*, vel *individuisca*. Ita hæc explicat ipse THOMASIVS *Introduct. in Log. Cap. IV. §. 16. sqv.* ad quem eò lubentius provocamus, ut elucescat, quomodo asserta ab eo hominis regeniti & irregeniti differentia specifica cum his benè recteque dictis conveniat. Intelligitur autem ex istis, quænam specie differre dicantur, nimirum, quæ habent essentias diversas solis individuis pluribus communicabiles, per quas quodlibet eorum in esse peculiari talis rei constituitur, ac à rebus aliam essentiam habentibus distinguitur, ita ut, mutatis illis, talis naturæ ac speciei res esse desinat. Equidem Jctos, & sequentes eos Moralium Doctores nonnunquam terminum Speciei aliter usurpare deprehendimus, ut *Species*, etiam specialissima, illis dicatur *genus*; quemadmodum ex adverso Speciem vocant, quod nobis dicitur *individuum*. Ita namque utuntur his terminis in materia Contractuum, quando, in contractu Mutui idem *genus* tantùm reddi debere, traditur, i. e. non illa ipsa numero res, quæ data erat, sed res ejusdem naturæ in eadem quantitate ac qualitate: in Commodato autem eadem *species*, i. e. eadem numero res, quæ data erat: quæ aliàs, juxta significationem Logicam, ita efferrentur: In Mutuo reddendam esse